


丙丁炮戒録

上

2/0.1
1



タイトル番号 : 0047

書名 : 丙丁炮戒録

2冊



丙丁炯戒錄序


世傳丙午丁未之歲。古來多有
災異。宋紫望著一書。稱丙丁龜
鑑。自周秦至五季。歷舉其證。以
存人主之戒。其意懇矣。濱松
侯讀此。即有所感。因命其臣鹽
谷世弘。廣撫我前史所載。遂成

丙丁炯戒錄

林序

一

三畏齋



是編其發凡起例一倣紫氏之撰名之曰丙丁炯戒錄。甄居恒瀏觀史書。災異之至。固雖出於天數。而未嘗有不由於人事者。故洪範陳庶徵。而休咎惟其所取。果知非天厄。人人自為厄。可不懼耶。抑謂天之降災異。猶人

之罹疾病。苟當疾病而能藥治。則可以救危為安。值災異而能倣懼。則可以變孽為禎。矧復先其幾而防其兆。預為之戒備。則災異疾病何由而起。然則是編雖小。亦慎德之明戒。而醫國之良劑也。侯之此舉。其有補燮

理。豈淺尠之云乎。迨刻成見徵
鄙言。乃題簡端以還之。

天保十一年小春月林旣撰



河三夾書

丙丁炯戒錄序

天地之道。以生生爲常。既其生物也。無不
欲亨毒而長遂之。然其運有常變之數。而
常變各有盛衰之異。不必謂常吉而變凶。
故其有常變盛衰。亦常理也。乃其所以爲
生生也。夫人道順承乎天而已。運常則處
常焉。數變則處變焉。有盛衰則處盛衰焉。
唯敬以不盭於天。戒以不逆於數。是之謂

順承乎天。若其不然。必致凶禍。此則人自取焉耳矣。宋紫望檢知丙午丁未之歲。多有災害。嘗著一書。曰丙丁龜鑑。我拾遺濱松侯夙入臺閣。厲精圖治。一日讀紫氏之書有所感。因命儒臣鹽谷世弘。哀錄本邦古今丙丁之事。名曰丙丁炯戒錄。效紫氏也。編成蒙眎。且見徵叙引。坦乃曰。善夫。侯之有此舉也。君子之戒。固在於平

日。不在於臨時。知運之有變。而敬懼不弛。察物之有數。而戒備不忽。乃能順乎常變。各處之靡弗中。是其所以無患也已。書云。惟事事。乃其有備。有備無患。此之謂也。惟常人不能然。苟偷安於無事。而驟戒於臨時。是以有凶矣。侯之此舉。蓋欲使人之有鑑乎前古。以知所懼。預爲之備也。此其有益於世道人心也多矣。凡讀此編者。能

體 侯之心。惕然敬懼。預備有餘。則庶與
贊其變理之一端。抑又順承乎天之道。然
也歟。乃書此以弁諸簡首。

天保庚子歲春季中澣佐藤坦謹叙



序

我

公佐

大政之暇。常以觀書史為樂。頃讀宋牝望

丙丁龜鑑而有感焉。命臣世弘倣其體。輯

本朝事蹟。為一書以進。臣謹取舊史。斷自

用明帝。至

後奈良帝。因事立論。壹倣牝氏之書。釐為二

卷名曰丙丁炯戒錄。欲爲君相者觀以爲
監戒也。序曰。書稱弗畏人畏。畏之於人大
矣。蓋在下之人。父兄可畏也。師友可畏也。
官吏可畏也。在上之人。天可畏也。民可畏
也。祖宗神靈可畏也。然下之人恒深於所
畏。而上之人恒淺於所畏。蓋下之人不畏
父兄。鞭挾輒至。不畏師友。督責隨至。不畏
官吏。刑誅立至。至者近而受者切。欲勿深

得乎。上之人。則不畏天。而殃咎未必輒至。
不畏民。而怨讟未必隨至。不畏祖宗神靈。
而罪疾未必立至。至者遠而受者緩。是以
其於所畏也恒淺。雖然。下之人或不畏。咎
止其身。而至於上之人。禍及宗社民人。則
上之人尤不可以不深畏也。故明君視天
猶父。視民猶家人。而以祖宗神靈爲洋洋
在上。又在左右。風雨不節。則曰刑賞不當

歟。寒暑不時。則曰行事有虧歟。一夫不獲其所。則曰是我陷之也。國有妖孽。則曰祖宗神靈其傲予也。至遠者每視以爲至近。責之於內。而不求之於外。是以德日新而政日修也。故曰畏之於人大矣。抑五行之說盛於漢。宋歐陽子排之。而其傳衰矣。丙丁之爲厄。柴氏只謂自古而然。而不著其說。至於元人續錄序。載陰陽家之言云。丙

丁屬火。遇午未而盛。故陽極必戰。亢而有悔也。則亦五行說之類耳。達者不必言也。顧龜鑑之所以作。意在令人主知所畏焉。而我

公之所取。亦專在於此也。臣才劣學薄。綴緝蕪陋。論斷失當。不能仰副盛意。然編中所載。上下殆乎千年。有天變。有地妖。有人害。凡可備君相之畏戒者。畧具。讀者設身

處地。省諸己。推諸當世之務。則於新德修政之際。或庶幾乎有小補云。

歲次戊戌天保九年建午月

臣鹽谷世弘再拜謹撰

丙丁炯戒錄卷上

臣鹽谷世弘謹輯

用明天皇

元年丙午

二年丁未

元年。夏五月。穴穗部皇子遣大連物部守屋率兵擊三輪逆殺之。逆者先朝之寵臣也。時敏達帝之喪尚在殯。逆衛殯宮。皇子

欲烝炊屋姬皇后。強入殯宮。逆拒而不納。故怒而殺之。大臣蘓我馬子時在皇子所。嘆曰。天下必不久而亂矣。守屋曰。非汝小子之所知也。

二年春。帝不豫。厩戶皇子侍側。祈佛誦經。帝因欲事佛。以其無故事。召群臣議。守屋與中臣勝海奏曰。舍國神而祈蕃神。不可。馬子曰。宜從叡旨。即延僧入內。厩戶握馬

子手。泣曰。非大臣歸心福田。誰成今日事者。馬子叩頭曰。殿下務興佛法。臣死日猶生年也。守屋睥睨二人。意色俱惡。厩戶謂左右曰。大連昏因果之理。禍今至矣。馬子遂與厩戶謀殺守屋。先令舍人迹見赤擣伺間擊殺勝海。守屋乃退居阿都。備兵自衛。夏四月。帝崩。繼嗣未定。守屋欲立穴穗部皇子。馬子遣兵殺皇子。遂圍守屋。澁川